

In sigl or en la vita

In film documentar da Menga Huonder-Jenny e la Televisiun Rumantscha

■ (rtr) **La cineasta Menga Huonder-Jenny ha accompagna durant in onn 7 giuvenis e giuvinas sin la tschertga per ina piazza d'emprendissadi. Il resultat final è in film giuven e frestg cun maletgs commovents.** Malgrà sia ligerezza reusseschi al film da mussar las difficultads ed ils embrugls ch'occupeschan ils giuvenils sin la sava al mund dals creschids. Betg tut ils giuvenils cumenzan suenter la scola in emprendissadi u in studi. Il 2010 èn p. ex. 14% dals giuvenils en il Grischun sa decidids da far in onn intermediar e 3% n'han anc insumma nagina perspectiva per lur avegnir professiunal.

Co vinavant suenter la scola?

Francisco n'ha betg gì il curaschi da s'annunziar durant il temp da

scola ordinari per in emprendissadi sco informaticher. L'emprim vul el sa perfecziunar en la lingua tudestga ed en matematica. Pir avant intgins onns è Francisco arrivà dal Portugal en Svizra, a Vulpera en l'Engiadina Bassa. Ussa visita el in onn da scolaziun e tscherna da professiun a l'Accademia Engiadina a Samedan. Mario da Münstair ha tramess – senza success – bleras annunzias. Sia finamira è quella da survegnir ina piazza d'emprendissadi da vender in ina butia da sport. Verena e Veronica han omaduas anc nagina piazza d'emprendissadi e frequentan medemamain in onn intermediar a l'Accademia. Nico, Curdin e Mathias absolvan in onn da tscherna da professiun en la Casa Depuoz, il center per scolaziun ed integraziun a Trun. Ils trais giuvenils han basegns da sco-

laziun specifics ed han perquai frequentà la scola ordinaria en la scola speziala. Persuenter han els qualitads che mancan ad auters giuvenils: Els lavuran gugent, èn punctuals e fitg motivads. Per ch'els possian pli tard bandunar l'ambient protegì da la scola e chattar lavur sin la fiera libra èn ina buna preparaziun ed accompagnament professiunal da gronda impurtanza per els.

Il film mussa co ils giuvenils vegnan confruntads cun trumpeadas, co ch'els empernan da surprendre responsabladad ed adina puspè s'orientar danovamain.

Datas d'emission:

SF1 02-01-2011, 17.30

SF info 05-01-2011, 08.30, 09.30, 10.30 e 12.50

SF info 06-01-2011, 10.55

SF1 08-01-2011, 17.15

RSI LA1 09-01-2011, 07.30